

順化第十一

天以陽生萬物以陰成萬物生仁也成義也

註 陰陽以氣言仁義以道言詳已見圖解矣

故聖人在上以仁育萬物以義正萬民

註 所謂定之以仁義

天道行而萬物順聖德修而萬民化大順大化不見其迹莫知

其然之謂神

註 天地聖人其道一也

故天下之眾本在一人道豈遠乎哉術豈多乎哉

註 天下之本在君君之道術在仁義

道藏輯要

通書

九

二星集七川文

治第十二

十室之邑人人提耳而教且不及况天下之廣兆民之眾哉曰

純其心而已矣

註 純者不雜之謂心謂人君之心

仁義禮智四者動靜言貌視聽無違之謂純

註 仁義禮智天行之德也動靜陰陽之用而言貌視聽五行而必求是四者之實矣

心純則賢才輔

註 君取人以身臣道合而從也

賢才輔則天下治